

四庫全書

史部

欽定四庫全書

資治通鑑後編卷八十七

刑部尚書徐乾學撰

宋紀八十七

起柔兆攝提格正月盡六月凡六月

哲宗憲元繼道顯德定功欽文睿武齊聖昭孝皇

帝

諱煦神宗第六子母曰欽聖皇后朱氏熙寧九年十二月巳丑生于宮中赤光照室初名傭授

檢校太尉天平軍節度使封均國公元豐五年

遷開府儀同三司進封延平郡王八年二月神

宗寢疾宰相王珪乞早建儲為宗廟社稷計又奏請皇太后權同聽政神宗首肯遂奉制立為

皇太子初太子宮中常有
赤光至是光益熾如火

元祐元年春正月庚寅朔詔改元 承議郎守起居舍

人邢恕嘗教高公繪上書乞尊禮朱太妃為高氏異日

之福太皇太后呼公繪問曰汝不識字誰為汝作此書

公繪不敢諱言者又論恕游歷權貴不自檢慎甲午謫

恕以本官權發遣隨州時恕已除中書舍人於是罷其

新命并絀之於外

李燾曰恕教公繪上書據邵伯溫辨
誣邢恕之孫繹作其祖父言行錄云

欽成皇后為皇太妃自山陵回御藥吳靖方窺伺宣仁
意旨以太妃過失為獻謂隨靈駕曾發笑韓絳以故相

留守西京親至境上迎迓引見皇太妃納拜殊不為禮亦無慰勞之言公聞之朝路與宣仁猶子公繪相遇因及此公曰太妃昔則先帝之妃今乃主上之母小人間諜漸不可長公繪矍然遂密奏疏以為宜加尊禮仍引語切直過當不止如公所言宣仁覽之謂公繪太訐知公繪與公素厚前此公繪屢有密奏太母無不欣納往往以為得之於公也直遣人詰曰誰教汝為之莫是邢某與汝做來若不實說即根治公繪迫急即吐實云入疏時邢某實不知臣自為之然邢某之意亦如此韓縝微聞之因而媒孽無所不至劉拯鎮客也乃入劄言公闕與政事交游執政遂以為名罷中書舍人以本官知隨州溫公即有簡與公曰和叔此行出於意外光居政府不能為和叔別白負愧誠深蓋以中京有交游執政之言恐益為和叔累故也其後明堂前兩月溫公檢公被責一宗文字欲將上辨白諸公勸之以為不若待至赦後而赦前兩日溫公薨矣時呂公亦在政府與溫公

意合而林希素忌公其弟旦方為言官初旦事溫公欲為省郎未及白用希薦於韓乃為工部員外郎遂除殿中侍御史恐公遂還朝乃於赦後未開假日入疏論公曰呂公著素與邢某厚善今來既經明堂公著必須復引邢某還朝乞未得令還自是申公避嫌不復敢言然希旦亦不為公論所容未幾兄弟相繼逐去時申公方盛旦既犯申公衆論不與非特為公也繹所載如此蓋多妄言姑附見

甲辰王巖叟奏

自冬不雪今涉春矣旱暵為災變異甚大陛下於天下之大害朝中之大姦已悟而復疑將斷而又止大害莫如青苗免役之法陰困生民荼鹽之法流毒數路大姦莫如蔡確之陰邪險刻章惇之讒欺狠戾陛下乃容而

留之此天心之所以未祐也 以集賢校理黃廉為戶部郎中先是廉提舉河東路保甲凡六年司馬光閒居往來河洛間聞其治狀呂公著亦言河東軍與邊民德之遂有是除 丁未詔回賜高麗王鞍馬服帶器幣有加 罷陝西河東元豐四年後凡緣軍興增置官局辛亥朱光庭言蔡確章惇韓縝不恭不忠不恥議論政事之際惇明目張膽肆為辯說力行醜詆確則外示不校中實同欲陽為尊賢陰為助邪縝則每當議論亦不

扶正唯務拱默為自安計願罷去確等柄任別進忠賢
以輔聖治不報 癸丑太皇太后躬詣中太一宮集禧
觀祈雨 丙辰太皇太后詔曰原廟之立所從來久矣
前日神宗皇帝初即祠宮並建寢殿以崇嚴祖考其孝
可謂至矣今神宗既已升祔於故事當營館御以奉神
靈而宮垣之東密接民里欲加開展則懼成煩擾欲採
縉紳之議皆合帝后為一殿則慮無以稱神宗欽奉祖
考之意聞治隆殿後有園池以后殿推之本留以待未

亡人也可即其地立神宗原廟吾萬歲之後當從英宗
皇帝於治隆上以寧神明中以成吾子之志下以安臣
民之心不亦善乎 帝幸相國寺祈雨 時新法多所
釐革獨免役青苗將官之法猶在而西戎之議未決司
馬光以疾謁告凡十有三旬不能出歎曰四患未除吾
死不瞑目矣乃力疾移書三省曰今法度宜先更張者
莫如免役錢光見欲具疏奏聞若降至三省望諸公協
力贊成又手書與呂公著曰光自病以來以身付醫以

家事付愚子惟國事未有所託今以屬晦叔矣中書舍人范百祿言於光曰熙寧免役法行百祿為咸平縣開封罷遣衙前數百人民皆欣幸其後有司求羨餘務刻剥乃以法為病今第減助苗錢額以寬民力可也光不聽二月辛酉以河決大名壞民田艱食者衆詔安撫使韓絳詢訪賑濟乙丑命蔡確提舉修神宗實錄以鄧溫伯陸佃並為修撰官林希曾肇並為檢討官詔權罷修河放諸路兵夫司馬光奏免役之法有五害

舊日上戶充役有所陪備然年滿之後却得休息今則年年出錢錢數多於往日陪備者其害一也舊日下戶元不充役今來一例出錢其害二也舊日所差皆土著良民今召募四方浮浪之人作公人則曲法受賊主官物則侵欺盜用一旦事發挈家亡去其害三也農民所有不過穀帛與力今日我不用汝力輸我錢我自雇人若遇凶年則不免賣莊田牛具桑柘以求錢納官其害四也提舉常平司惟務多歛役錢廣積寬剩希求進用

其害五也為今之計莫若降勅應天下免役錢一切並罷其諸色役人並依熙寧以前舊法定差惟衙前一役最號重難廩有破家產者朝廷為此始議作助役法今衙前陪備既少當不至破家若猶慮力難獨任即乞依舊於官戶僧道寺觀單丁女戶有屋業者並令隨貧富等第出助役錢遇衙前重難差遣即行支給然役人利害四方不能齊同乞指揮降諸路轉運司下諸州縣限五日內縣具利害申州州限一月申轉運司司類聚限

一季奏聞委執政官參詳施行是日三省樞密院同進
呈得旨依奏 丁卯詔侍從各舉堪任監司者二人舉
非其人有罰 韓維言光祿大夫致仕范鎮在仁宗朝
首開建儲之議而鎮未嘗以語人人亦莫為言者故恩
賞獨不及鎮伏望聖慈特降明詔褒顯厥功於是具以
鎮十九疏上之己巳拜鎮端明殿學士仍以其子平西
縣令百揆為宣德郎 庚午禁邊民與夏人為市 辛
未以侍御史劉摯為御史中丞 詔起居舍人依舊制

不分記言動 武威郡王棟戩卒以其養子阿里庫為河西軍節度使封寧塞郡公阿里庫頗峻刑殺其下不遑寧詔飭以推廣恩信副朝廷所以封立前人所以付與之意 司馬光奏復差役法既得旨知開封府蔡京即用五日限令兩縣差一千餘人充役亟請東府白光光喜曰使人人如待制何患法之不行乎議者謂京但希望風旨苟欲媚光非其實也 癸酉以監察御史王巖叟為左司諫 右司諫蘇轍始供職上言帝王之治

必先正風俗風俗既正中人以下皆自勉於為善風俗
一敗中人以上皆自棄而為惡邪正盛衰之源未有不
始於此昔真宗獎用正人孫奭戚綸田錫王禹偁之徒
既以諫諍顯名忠良之士相繼而起其耄期厭事丁謂
乘間將竊國命而風俗已成無與同惡謀未及發旋即
流放仁宗仁厚是非之論一付臺諫孔道輔范仲淹歐
陽修余靖之流以言事相高時執政大臣豈皆盡賢然
畏忌人言不敢妄作一有不善言者即至隨即屏去故

雖人主寬厚而朝廷之間無大過失及先帝嗣位執政大臣變易祖宗法度惟有呂誨范鎮等明言其失二人既已得罪臺諫有以一言及之者皆紛然逐去由是風俗大敗臣願陛下永惟邪正盛衰之漸始於臺諫修其官則聽其言言有不當隨事行譴使風俗一定忠言日至則太平之治可立而待也 甲戌御邇英閣侍讀韓維言陛下仁孝發於天性每行見昆蟲螻蟻輒避而過之且勅左右勿踐履此亦仁術也臣願陛下推此心以

及百姓則天下幸甚 司馬光言復行差役之初州縣
不能不少有煩擾伏望朝廷執之堅如金石雖小小利
害未周不妨徐為改更勿以人言輕壞利民良法章惇
取光所奏凡疎畧未盡者枚數而駁奏之又嘗與同列
爭曰保甲保馬一日不罷則有一日之害如役法者熙
寧初以雇代差行之太速故有今弊今復以差代雇當
詳議熟講庶幾可行而限止五日其弊將益甚矣呂公
著言光所建明大意已善其間不無疎畧惇言出於不

平之氣專欲求勝不顧朝廷大體乞選差近臣三四人
專切詳定聞奏 庚辰夏國遣使來貢 辛巳寶文閣
待制刑部侍郎蹇周輔坐變湖南鹽法抑勒騷擾落職
知和州 蘇軾言於司馬光曰差役免役各有利害免
役之害聚歛於上而下有錢荒之患差役之害民常在
官不得專力於農而吏胥緣以為奸此二害輕重蓋畧
等矣光曰於君何如軾曰法相因則事易成事有漸則
民不驚三代之法兵農為一至秦始分為二及唐中葉

盡變府兵為長征卒自是以來民不知兵兵不知農農
出穀帛以養兵兵出性命以衛農天下便之雖聖人復
起不能易也今免役之法實大類此公欲驟罷免役而
行差役正如罷長征而復民兵蓋未易也光不以為然
初差役行於祖宗之世法久多弊編戶充役不習官府
吏虐使之多致破產而狹鄉之民或有不得休息者免
役使民以戶高下出錢而無執役之苦但行法者不循
上意於雇役實費之外取錢過多民遂以病光為相知

免役之害而不知其利欲一切以差役代之軾獨以實告而光不悅軾又陳於政事堂光色忿然軾曰昔韓魏公刺陝西義勇公為諫官爭之甚力韓公不樂公亦不顧軾嘗聞公道其詳豈今日作相不許軾盡言耶光笑而謝之范純仁與光素厚謂光曰治道去其太甚者可也差役一事尤當熟講而緩行不然滋為民病且宰相職在求人變法非所先也願公虛心以延衆論不必謀自己出謀自己出則諂諛得乘間迎合矣設議或難回

資治通鑑後編

不足者情也苟未能杜其興作之情而徒欲禁其散歛
變置之法是以百說而百不行今遂廢青苗罷市易蠲
役錢去鹽法凡號為利而傷民者一掃而更之則向來
用事於新法者必不喜矣不喜之人必不但曰不可廢
罷蠲去必操不足之情言不足之事以動上意雖致石
而使聽之猶將動也如是則廢罷蠲去者皆可復行矣
為今之策當大舉天下之計深明出入之數以諸路所
積之錢粟一歸地官使經費可支二十年之用數年之

間又將十倍於今日使天子曉然知天下之餘於財也則不足之論不得陳於前然後新法可永罷而無敢議復者矣昔安石之居位也中外莫非其人故其法能行今欲救前日之敝而左右侍從職司使者十有七八皆安石之徒雖起二三舊臣用六七君子然累百之中存其十數烏在其勢之可為也勢未可為而欲為之則青苗雖廢將復散況未廢乎市易雖罷且復置況未罷乎役錢鹽法亦莫不然以此救前日之敝如人久病而少

間其父子兄弟喜見顏色而未敢賀者以其病之猶在也光得書聳然後竟如其慮 閏月己丑朔王巖叟入對言祖宗遺戒不可用炎人如趙普范質寇準李沆王曾王旦韓琦富弼張知白魯宗道薛奎皆中原人張洎丁謂章得象王安石蔡確章惇呂惠卿張璪皆炎人小則為身謀大則害於國帝曰為是舊臣巖叟曰孰非舊臣帝曰近日頗旱巖叟曰以聖德如此無致災變之理惟政府有此人所以致旱也 庚寅尚書左僕射蔡確

罷山陵使事畢確猶偃蹇於位於是劉摯王巖叟孫覺
蘇軾朱光庭彈章交上十數確浸不自安遂連表乞解
機務表詞有曰收拔當世之耆老以陪輔王室蠲省有
司之煩碎以慰安民心嚴邊備以杜二虜之窺覷走軻
傳以察遠方之疲瘵明法令之美意以揚先帝之惠澤
厲公平之一道以合衆志之異同其言高自矜伐孫覺
蘇轍愈不平復上疏論之轍疏曰自法行以來民力困
敝海內愁怨先帝晚年寢疾彌留灼知前事之失親發

德音將洗心自新以合天意而此志不遂奄棄萬國天下聞之知前日弊事皆先帝之所欲改思慕聖德繼之以泣是以皇帝踐阼聖母臨政奉承遺旨罷道洛廢市易損青苗止助役寬保甲免買馬放修城池之役復茶鹽鐵之舊黜吳居厚呂孝廉宋用臣賈青王子京張誠一呂嘉問蹇周輔等命令所至細民鼓舞相賀今小臣既經罷黜至於大臣則因而任之臣竊惑矣確所上表雖外逼人言若欲求退而論功攘善實圖自安所云收

拔當世之耆艾以陪輔王室臣謂當世之耆艾乃確昔日之所抑遠者也所云蠲省有司之煩碎以慰安民心臣謂有司之煩碎乃確昔日之所創造者也此二事皆確為政無狀以累先帝之明非陛下卓然獨見誰能行此確不自引咎反以為功則是確等所造之惡皆歸先帝而陛下所行之善皆歸於確也時司馬光呂公著進用蠲除煩苛確言皆已所建白公論益不容太皇太后猶不忍遽斥至是始罷為觀文殿學士知陳州尋改亳州

州以門下侍郎司馬光為尚書左僕射兼門下侍郎
光以疾方賜告不能入謝帝遣閣門副使齎告印至其
家賜之光辭疾稍間將起視事詔免朝覲許以肩輿三
日一入都堂或門下尚書省光不敢當曰不見君不可
以視事詔光肩輿至內東門子康扶入對小殿且命無
拜光惶恐請對延和殿詔許乘肩輿至崇政殿垂簾日
引對餘依前降指揮光入對再拜遂退而視事王安石
時已病弟安禮以邸吏狀示安石安石曰司馬十二丈

作相矣悵然者久之 詔韓維呂大防孫永范純仁詳

定役法以聞從呂公著言也 壬辰以尚書左丞呂公

著為門下侍郎 命司馬光提舉編修神宗實錄 丙

申詔提舉官累年積蓄盡樁作常平倉錢物委提點刑

獄交割主管依舊常平倉法 丁酉王巖叟入對言求

治不可太急太急則奸人有以迎意進說又奏乞察賢

不賢而去留之若賢者留不賢者亦留則賢者恥而不

樂為用又奏兩宮垂簾杜絕內降太皇太后曰此事必

無不須憂也

劉摯言保甲罷團教臣竊有私憂過計

者夫鄉野之民其性易於轉習今之保甲衣必華細食必酒肉固已變其向者布麻粗糲之習矣羣聚而笑喧奮臂而矜勇固已移其椎魯勞苦之習矣臣愚以為宜有法以歛制之凡保甲之技藝强弱高下州縣皆有等籍今按取優等願為兵者刺以為本州禁軍自餘中下等亦依近制募充弓手手力耆戶長之役蘇轍言河北之民喜為剽劫近歲創為保甲驅之使離南畝教之使

習凶器今雖已罷而弓刀之手不可以復執鋤酒肉之口不可以復茹蔬既無所歸勢必為盜臣願於元豐庫或內藏庫乞錢三十萬貫為招軍創物選文武臣僚有才幹者各一二人分往河北於保甲中招其強勇精悍者為禁軍隨其人才以定軍分上為先帝收恩於既往下為社稷消患於未萌 劉摯言知樞密院章惇素無才行近者差役之復乃三省同樞密進呈惇果有所見當即敷陳講畫今勅命宣布始退而橫議惇非不知此

法之是與非也蓋寧負朝廷而不忍負王安石欲存面目以見安石而已 甲辰劉摯言臣伏見戶部尚書曾布在熙寧初王安石託以腹心故其政皆出於布之謀其法皆造於布之手臣時為御史曾以此告之先帝曰大臣誤朝廷而大臣所用者誤大臣蓋指布輩也 朱光庭奏今日廟堂之上司馬光未出唯有呂公著一人忠樸可倚其餘皆姦邪伏望聖慈早進范純仁庶得賢者在位同心一德以輔聖政 以西京國子監教授程

願為校書郎用王巖叟薦也

詔英州編管人鄭俠特

放逐便仍除落罪名尚書吏部先次注舊官與合入差遣從監察御史孫升左司諫蘇轍所奏也 辛亥章惇

罷司馬光呂公著改更弊事惇與蔡確在位窺伺得失惇尤以謔侮困光臺諫交章疏其罪惡請黜之未報已而惇復與光簾前爭論喧惇至曰它日安能奉陪喫劍太皇太后怒於是劉摯奏言惇佻薄險悍諂事王安石以邊事欺罔朝廷遂得進用及安石補外又傾附呂惠

卿當時號為入室之人隨時反覆物論賤之黃緣至於執政以強市兩浙民田及寄語臺官等事為言路所擊而先帝益薄其為人黜之未幾復為蔡確所引以至今日夫去惡莫如盡陛下既去確而今尚留惇非朝廷之利乞付臣章於三省正其橫議害政彊愎慢上之罪顯然絀之可也王巖叟奏言惇廉隅不修無大臣體每聞縱肆猖狂為俳諧俚語侵侮同列諫官孫覺嘗論邊事不合惇意而惇肆言於人曰議者可斬中外聞之無不

駭愕自古未嘗有大臣敢出此語脅諫官者陛下詔求
直言而惇斥上書人為不逞之徒其意不欲陛下廣聰
明也陛下登用老成舊德而惇亦指為不逞之徒其意
不喜陛下用正人也今復於簾前爭役法辭氣不遜陵
上侮下敗羣亂衆真小人之傑蓋見陛下用司馬光作
相躁忿忌嫉有不樂朝廷之心所以如此伏乞罷免以
慰天下之望帝曰深知卿言惇遂罷為正議大夫知汝
州 甲寅詔侍從御史國子司業各舉經明行修可為

學官者二人 乙卯以同知樞密院事安燾知樞密院
事試吏部尚書范純仁同知樞密院事王巖叟言安燾
資材闢茸器識闇昧舊位且非所據況可冠洪樞顓兵
柄所有畫黃謹繳進其范純仁除命伏乞分為別勅行
下蘇轍孫覺劉摯亦相繼論燾無一善可稱不當驟遷
高位 罷諸州常平管勾官 丁巳安燾辭免新命勅
黃付王巖叟書讀巖叟又封還 詔放免内外市易錢
并坊場淨利錢又詔已前積欠免役錢與減放一半

已未王巖叟言陛下用范純仁雖驟何故無一人有言
蓋賞賢也一進安燾則諫官御史交章論奏蓋非公望
所與也臣兩次論駁竊聞已有指揮門下省更不送給
事中書讀令疾速施行臣位可奪也而守官之志不可
奪身可忘也而愛君之心不可忘陛下既重改成命則
願別差官權給事中以全孤臣之守 庚申劉摯言安
燾范純仁告命不由給事中直付所司陛下自隳典憲
使人何所守乎不報 詳定役法所言乞下諸路除衙

前外諸色役人只依見用人數定差官戶僧道寺觀單
丁女戶出錢助役指揮勿行從之王安石聞朝廷變其
法夷然不以為意及聞罷助役復差役愕然失聲曰亦
罷至此乎良久曰此法終不可罷也 司馬光言取士

之道當以德行為先文學為後就文學之中又當以經
術為先辭采為後為今日計莫若依先朝成法合明經
進士為一科立周易尚書毛詩周禮儀禮禮記春秋孝
經論語為九經令天下學官依注疏講說學者博觀諸

家自擇短長各從所好春秋止用左氏傳其公羊穀梁
陸淳等說並為諸家孟子止為諸子更不試大義應舉
者聽自占習三經以上多少隨意皆須習孝經論語光
以奏藁示范純仁純仁答光曰孟子恐不可輕且朝廷
欲求衆人之長而元宰先之似非明夷蒞衆之義不若
清心以俟衆論可者從之不可更俟諸賢議之如此則
逸而易成有害亦可改矣光欣然納之 戊辰蘇轍言
陛下用司馬光為相而使韓縝以屠沽之行與之同列

以臣度之不過一年鎮之邪計必行邪黨必勝光不獲罪而去則必引疾而避矣去歲虜使入朝見鎮在位相顧反脣微笑鎮舉祖宗七百里之地無故與之聞契丹地界之謀出於耶律用正今以為相虜以闢國七百里而相用正朝廷以感國七百里而相鎮臣愚所未諭也庚午以吏部侍郎李常為戶部尚書常文士少吏幹或疑其不勝任以問司馬光光曰使此人掌邦計則天下知朝廷非急於征利貪吏捃刻之患庶幾少息矣

以中書舍人胡宗愈為給事中起居舍人蘇轍為中書
舍人 軍器監丞王得君言臣僚上章與議改法但許
建明事情不得妄有指斥內出手詔曰予方開廣言路
得君意欲杜塞人言無狀若此可罷職與外任監當得
君於是謫監永城縣倉 三月辛未詔毋以堂差衡
在選已注官 置訴理所許熙寧以來得罪者自言
命太學公試司業博士主之如春秋補試法 壬申詔
安燾堅辭知樞密院事特依所乞仍同知樞密院事

詔劉摯王覲及刑部郎中杜紘將元豐勅令格式重行刊修 癸酉置開封府界提點刑獄一員 乙亥罷熙河蘭會路經制財用司 己卯復廣濟河輦運 辛巳詔民間疾苦當議寬恤者監司具聞 以校書郎程頤為崇政殿說書從司馬光言也 頤進三劄其一曰陛下春秋方富輔養之道不可不至大率一日之中接賢士大夫之時多親宦官宮妾之時少則自然氣質變化德器成就乞遴選賢士入侍勸講講罷常留二人直日夜

則一人直宿以備訪問或有小失隨事獻規歲月積久必能養成聖德其二曰三代必有師傅保之官師道之教訓傳傳其德義保保其身體臣以為傳德義者在乎防見聞之非節嗜好之過保身體者在乎適起居之宜存畏謹之心欲乞皇帝左右扶持祇應宮人內臣並選年四十五以上厚重小心之人服用器玩皆須質樸及擇內臣十人充經筵祇應以伺候皇帝起居凡動息必使經筵官知之其三曰竊見經筵臣僚侍者皆坐而講

者獨立於禮為悖乞今後特令坐講以養主上尊儒重
道之心臣以為天下重任惟宰相與經筵天下治亂係
宰相君德成就責經筵由此言之安得不以為重願每
以師道自居其侍講色甚莊言多諷諫聞帝在宮中盥
而避蟻問有是乎帝曰有之願曰推此心以及四海帝
王之要道也帝嘗憑檻偶折柳枝願正色曰方春時和
萬物發生不可無故摧折帝不悅御史呂陶言司農
少卿范子淵在元豐時提舉河工糜費巨萬護堤壓埽

之人溺死無算而功卒不成乞行廢放於是黜知峽州制畧曰汝以有限之財興必不可成之役驅無辜之民置諸必死之地中書舍人蘇軾詞也 夏四月己丑韓縝罷先是王巖叟言蔡確章惇之大奸臣先已論之其次韓縝之鄙俗不學張璪之陰邪不正李清臣之柔佞不立安燾之闖茸不才此四人者自執政以來有益國家者何事伏望別圖賢才任以大柄臺諫前後論縝過惡甚衆皆留中不報太皇太后宣諭孫覺蘇轍曰進退

大臣當存國體。雖不協人望。要須因其求去而後出之。劉摯等攻之益急。縝遂乞出。以光祿大夫觀文殿大學士知潁昌府京西北路安撫使。內批縝自以為不才。恐妨賢路。故乞出外視矜功要名而去者。縝為得進退之體。故有遷官之異。宜於制詞中聲說此意。矜功要名。蓋指蔡確章惇也。詔太師致仕文彥博肩輿赴闕。令河南津置行李。先是司馬光除左僕射。固辭以疾。乞召用彥博。范純仁亦以彥博老成。勸帝召致之。及將罷韓

鎮太皇太后以御劄付光欲除彥博太師兼侍中行右
僕射事光奏彥博官為太師年八十一臣後進而位居
其上非所以正大倫也不聽 蘇轍言禮部欲復詩賦
司馬光乞以九經取士二議並未施行乞先降指揮明
言來年科場一切如舊但所對經義兼取注疏及諸家
議論不專用王氏之學仍罷律義然後徐議更制未為
晚也 司馬光乞令提點刑獄司指揮逐縣令佐體量
鄉村人戶有闕食者一面申知上司及本州更不候回

報即將本縣義倉及常平倉米穀直行賑濟夏秋成熟令隨稅送納毋得收息令佐有能用心存恤民不流移者優與酬獎否則取勘聞奏從之 辛卯詔諸路旱傷

蠲其租 壬辰以旱慮因 癸巳特進荆國公王安石

卒安石性彊忤遇事無可否自信所見執意不回至議變法在廷交執不可安石傳經義出己意辨論輒數百言衆不能詘甚者謂天變不足畏祖宗不足法人言不足恤罷黜中外老成人幾盡多用門下儼慧少年久之

卷之通鑑後編

政大臣各舉可充館閣者三人 壬寅詔守太師致仕
文彥博特授太師平章軍國重事以門下侍郎呂公著
為尚書右僕射中書侍郎太皇太后欲用彥博為右相
劉摯王覲並言彥博春秋高不可為三省長官朱光庭
亦三上章以為彥博師臣不宜煩以吏事若右相則呂
公著韓維范純仁皆可為之帝問司馬光光對曰若令
彥博以太師平章軍國重事亦足尊老成矣又言宜為
右相者莫如呂公著帝皆聽之又詔彥博一月兩赴經

筵六日一入朝因至都堂與輔臣議事如遇有軍國機
要即不限時日並令入預參決先是執政官每三五日
一聚都堂吏目抱文書歷諸廳白之故為長者得以專
決同列難盡爭也光嘗懇蔡確欲數會議庶各盡所見
而確終不許公著既秉政乃日聚都堂長貳並得議事
遂為定制 乙巳詔戶部裁冗費著為令 黜內侍李
憲等於外劉摯言陛下臨御以來分別邪正而元惡大
憝猶有漏網宦者李憲貪功生事漁歛生民膏血興靈

之役首違師期乃頓兵城蘭州遺患今日王中正將兵二十萬出河東逗遛違詔精卒勁騎死亡殆盡宋用臣董大工役侵陵官司誅求小民奪其衣食之路石得一領皇城司縱遣伺者飛書朝上則暮入徃行朝士都人相顧以目者殆十年此四人者權勢烽焰張灼中外幸而先帝神武足以鎮壓不然其為禍豈滅漢唐宦者哉侍御史林旦亦以為言詔並降官憲中正得一提舉官觀用臣監太平州稅務辛亥文彥博入對命其子貽

慶扶掖上殿賜貽慶金紫章服 揚王顥荆王顥並特
授太尉 司馬光請立經明行修科歲委升朝文臣各
舉所知以勉勵天下使敦士行以示不專取文學之意
若所舉人違犯名教必坐舉主毋赦於是詔自今凡遇
科舉令升朝官各舉經明行修之士一人俟登第日與
升甲 罷謁禁之制 知誠州周士隆撫納溪峒民一
千三百餘戶賜士隆銀帛 癸丑三省言尚書六曹職
事間劇不等今欲減定以主客兼膳部職方兼庫部都

官兼司門屯田兼虞部定為三十五員又言常平倉春秋歛散以陳易新及歲饑賑貸主司並依法推行降貸常平錢穀絲麥豐熟隨夏稅先納所輸之半願併納者止出息一分並從之 五月丁巳朔以資政殿大學士

兼侍讀韓維為門下侍郎 罷諸路重祿復熙寧前舊

制 庚申夏國遣使來賀即位 壬戌詔侍從臺官監

司各舉縣令一人 丁卯劉摯上疏曰學校為育材首

善之地教化所從出非行法之所雖羣居衆聚帥而齊

之不可無法亦有禮義存焉先帝養士之盛比隆三代
然太學屢起獄訟有司緣此造為法禁煩苛甚於治獄
條目多於防盜上下疑貳以求苟免尤可怪者博士諸
生禁不相見教諭無所施質問無所從月巡所隸之齋
而已齋舍既不一隨經分隸則又易博士兼巡禮齋詩
博士兼巡書齋所至備禮請問相與揖諾亦或不交一
言而退以防私請以杜賄賂學校如此豈先帝所以造
士之意哉願罷其制戊辰詔孫覺顧臨程頤同國子監

長貳修立太學條制 己巳幸揚王荆王第官其子九

人 乙亥蘇轍言前參知政事呂惠卿詭變多端見利

忘義王安石初任執政以為心腹安石山野之人彊狠
傲誕其於吏事宜無所知惠卿指摘教道以濟其惡青
苗助役議出其手韓琦始言青苗之害先帝知琦樸忠
翻然感悟欲退安石而行琦言當時執政皆聞德音安
石惶遽自失亦累表乞退天下欣然有息肩之望矣惠
卿方為小官自知失勢上章乞對力進邪說熒惑聖聽

巧回天意身為館殿攝行內侍之職親往傳宣以起安石肆其偽辯破難琦說仍為安石畫劫持上下之策大率多用刑獄以震動天下自是諍臣吞聲有識喪氣而天下靡然矣至於排擊忠良引用邪黨惠卿之力十居八九其後又建手實簿法尺椽寸土檢括無遺雞豚狗彘抄剗殆徧專用告訐推析毫毛鞭箠交下紙筆翔貴小民怨苦甚於苗役又因保甲正長給散青苗結甲赴官不遺一戶上下騷動不安其生遂至河北人戶流移

旋又興起大獄以恐脅士人如鄭俠王安國之徒僅保
首領而去其心本欲株連蔓引塗污公卿獨賴先帝天
姿仁聖每事裁抑故惠卿不得窮極其惡不然安常守
道之士無噍類矣既而惠卿自以賊罪被黜於是力陳
邊事以中上心其在延安始變軍制雜用蕃漢違背物
情壞亂邊政西戎無變妄奏警急擅領大衆涉入虜境
竟不見敵遷延而歸恣行欺罔立石紀功使西戎曉然
知朝廷有吞滅靈夏之意自是戎人怨叛邊鄙騷擾河

隴困竭海內疲勞永樂之敗大將徐禧本惠卿自布衣
保薦擢任始終協議遂付邊政敗聲始聞震動宸極馴
致不豫初實由此邊釁一生至今為梗安石之於惠卿
有卵翼之恩有父師之義方其求進則膠固為一更相
汲引以欺朝廷及其權位既均勢力相軋反眼相噬化
為仇敵始安石罷相以執政薦惠卿既已得位恐安石
復用遂起王安國李士寧之獄以梃其歸安石覺之被
召即起迭相攻擊期致死地安石之黨言惠卿使華亭

知縣張若濟借豪民錢置田產等事朝廷遣蹇周輔推
鞠獄將具而安石罷去故事不復究案在御史可覆視
也惠卿發安石私書其一曰無使齊年知齊年者馮京
也先帝猶薄其罪惠卿復發其一曰無使上知安石由
是得罪夫惠卿與安石出肺肝託妻子平居相結唯恐
不深故雖欺君之言見於尺牘不復疑間惠卿方其無
事已一一收錄以備緩急之用一旦爭利隨相挾搥不
遺餘力此犬彘之所不為而惠卿為之曾不愧恥惠卿

用事於朝廷首尾十餘年操執威柄凶醜所及甚於安石乞陛下斷自聖意畧正典刑縱未以汙鐵鑕猶當追削官職投畀四裔以禦魑魅 詔特贈呂誨通議大夫子由庚與堂除合入差遣以劉摯呂大防范純仁言其觸忤時宰譴死外藩故也 壬午詔文彥博已降旨令獨班起居自今赴經筵都堂凡同三省樞密院奏事並序官位在宰臣上 乙酉監察御史上官均言今之議者必以為往時之散青苗出於抑配故有前日之弊今

則募民之願取者然後與之而有司又不以多散為功
在民必以為便臣以為不然今天下民十室之中貲用
匱乏者六七誘以青苗之利無知之民不暇遠計必利
一時之得紛然趨赴雖曰不强抑配然而散歛追呼督
促之煩道塗往來之費輕用妄費賤售穀帛之患未免
如前日也故臣願行閏二月八日詔書罷去青苗復常
平昔年平糴之法茲萬世之通利也 六月詔自今科
場程試毋得引用字說從林旦言也 甲辰置春秋博

士 正議大夫提舉嵩山崇福宮呂惠卿落職降為中
散大夫光祿卿分司南京蘇州居住蘇轍劉摯王巖叟
相繼論惠卿罪惡不可不誅朝廷姑薄懲之故有是命
監察御史韓川言市易之說雖曰平均物直而其實
不免貨交以取利又所收不補所費請結絕見在物貨
晝日更不收買從之 司諫王覲言先帝令常平錢斛
存留一半遇穀貴減市價出糶成熟時增市價收糶務
在平穀價而已郡縣之吏妄意朝廷之法惟急於為利

故於青苗新令則競務力行於糶糴舊條則僅同虛設
伏望朝廷罷散青苗錢行舊常平倉法以成先帝之素
志 丙午王巖叟朱光庭蘇轍王覲言呂惠卿責授分
司南京不足以蔽其罪臣等豈不知降四官落一職為
分司在常人不為輕典乎蓋以堯之四凶魯之少正卯
既非常人不當復用常法治也 戊申吏部尚書孫永
等議神宗輔相之臣有若富弼秉心直亮操術閎遠歷
事三世計安宗社以配神宗廟庭實為宜稱詔從之初

議或欲以王安石或欲以吳充太常少卿鮮于侁曰勲
德第一惟富弼耳 庚戌太白晝見 辛亥呂惠卿責
授建寧軍節度副使本州安置不得僉書公事從王巖
叟等四人所奏也蘇軾草制詞曰呂惠卿以斗筭之才
挾穿窬之智諂事宰輔同升廟堂樂禍而貪功好兵而
喜殺以聚斂為仁義以法律為詩書首建青苗次行助
役均輸之政自同商賈手實之禍下及雞豚苟可蠹國
以害民率皆攘臂而稱首先皇帝求賢若不及從善如

轉圜始以帝堯之仁姑試伯鯀終然孔子之聖不信宰
予發其宿姦謫之輔郡尚疑改過稍畀重權復陳罔上
之言繼有碣山之貶反覆教戒惡心不悛躁輕矯誣德
音猶在始與知己共為欺君喜則摩足以相歡怒則反
目以相噬連起大獄發其私書黨與交攻幾半天下奸
賊狼籍橫被江東至其復用之年始倡西戎之隙妄出
新意變亂舊章力引狂生之謀馴致永樂之禍興言及
此流涕何追迨予踐阼之初首發安邊之詔假我號令

成汝詐謀不圖渙汗之文止為疑賊之具迷國不道從
古罕聞尚寬兩觀之誅薄示三苗之竄天下傳誦稱快
焉 甲寅詔曰先帝講求法度愛物仁民而搢紳之間
不能推原本意或妄生邊事或連起犴獄久乃知弊此
羣言所以未息朝廷所以懲革也整飭風俗修振紀綱
蓋不得已況罪顯者已正惡鉅者已斥則宜蕩滌隱疵
濶畧細故應今日以前有涉此事狀者一切不問言者
勿復彈劾有司毋得施行各俾自新同歸美俗始鄧綰

謫滁州言者未已太皇太后因欲下詔慰存反側呂公著以為宜然遂從之或謂公著曰今除惡不盡將遺患他日公著曰治道去太甚耳文景之世網漏吞舟且人才實難宜使自新豈宜使自棄邪 復置通利軍 乙卯程頤上疏曰今講讀官共五人四人皆兼要職獨臣不領別官近差修國子監條制是亦兼也乃無一人專職輔導者執政之意蓋惜人材不欲使之閒爾又以為雖兼他職不妨講讀此尤不思之甚也今夫鐘怒而擊

之則武悲而擊之則哀誠意之感然也告於人亦如是
古人所以齋戒而告君者何為也臣前後兩得進講未
嘗敢不宿齋戒潛思存誠覬感動於上心若使營於職
事紛其思慮待至上前然後善其辭說徒以頰舌感人
不亦淺乎今諸臣所兼皆要官若未能遽罷且乞免臣
修國子監條例俾臣夙夜精思竭誠專在輔導願一日
講顏子不改其樂既畢文義乃復言曰陋巷之士仁義
在躬人主崇高奉養備極苟不知學安能不為富貴所

移且顏子王佐才也而簞食瓢飲季氏魯國蠹也而富
於周公魯君用舍如此非後世之監乎文彥博呂公著
等入侍聞其講說輒相與歎曰真侍講也彥博對帝恭
甚或謂頤曰君之倨視潞公如何頤曰潞公三朝大臣
事幼主不得不恭頤以布衣為上師傅其敢不自重此
願與潞公所以不同也

此據宋名臣言行錄

執政有欲用為諫官

者頤以書謝曰公知射乎執弓於此發而多中人皆以
為善射一日使羿立其旁道以彀率不從羿且從而去

之矣從則戾其故習而失多中之功故不若處羿於無
事之地則羿得盡言而用舍羿不恤也願才非羿也然
聞羿之道矣慮其害公之多中也

此據伊
川文集

是月夏國

主遣訛囉聿來求蘭州米脂等五砦司馬光言此乃邊
鄙安危之機不可不察靈夏之役本由我起新開數砦
皆是彼田今既許其內附若靳而不與彼必曰新天子
即位我卑辭厚禮以事中國庶幾歸我侵疆今猶不許
則是恭順無益不若以武力取之小則上書悖慢大則

攻陷新城當此之時不得已而與之其為國家恥無乃
甚於今日乎羣臣猶有見小忘大守近遺遠惜此無用
之地者願決聖心為兆民計時異議者衆唯文彥博與
光合太皇太后將許之光又欲併棄熙河安燾固爭之
曰自靈武而東皆中國故地先帝有此武功今無故棄
之豈不取輕於外夷耶邢恕亦言此非細事當訪之邊
人光乃召禮部員外郎前通判河州孫路問之路挾輿
地圖示光曰自通遠至熙州纔通一徑熙之北已接夏

境今自北關瀕大河城蘭州然後可以扞蔽若捐以予
敵一道危矣光乃止

資治通鑑後編卷八十七

欽定四庫全書

資治通鑑後編卷八十八

刑部尚書徐乾學撰

宋紀八十八

起柔兆攝提格七月盡
著雍執徐六月凡二年

哲宗憲元繼道顯德定功欽文睿武齊聖昭孝皇帝

元祐元年秋七月丙辰朔詔罷試補學官法令尚書侍郎左右司郎中學士待制兩省御史臺官國子司業各

舉二人 丁巳置檢法官 辛酉立十科舉士法舊制
銓注有格槩拘以法法可以制平而不可以擇才故令
內外官皆得薦舉其後被舉者既多除吏愈難神宗乃
革去內外舉官法但用吏部審官院選格及帝即位王
巖叟言自罷羣舉而用選格可以見功過而不可以見
人才於是不得已而用其平日之所信故有踏逐申差
之目踏逐實薦舉而不與同罪且選才薦能而謂之踏
逐非雅名也况委人以權而不容舉其所知豈為通術

遂復內外舉官法司馬光奏曰為政得人則治然人之
才或長於此而短於彼雖臯夔稷契各守一官中人安
可求備故孔子以四科論士漢室以數路得人若指瑕
揜善則朝無可用之人苟隨器指任則世無可棄之士
臣備位宰相職當選官而識短見狹士有恬退滯淹或
孤寒遺逸豈能周知若專引知識則嫌於私若止循資
序未必皆才莫如使在位達官各舉所知然後克叶至
公野無遺賢矣欲乞朝廷設十科舉士一曰行義純固

可為師表科

有官無官人皆可舉

二曰節操方正可備獻納科

舉有

官人

三曰智勇過人可備將帥科

舉文武有官人

四曰公正聰明

可備監司科

舉知州以上資序

五曰經術精通可備講讀科

有官

無官人

皆可舉

六曰學問該博可備顧問科

同上

七曰文章典麗

可備著述科

同上

八曰善聽獄訟盡公得實科

舉有官人

九曰

善治財賦公私俱便科

同上

十曰練習法令能斷請讞科

同上

應執事官自尚書至給舍諫議寄祿官自開府儀同

三司至大中大夫帶職自觀文殿大學士至待制每歲

須於十科中舉三人仍具狀保任中書置籍記之異時
有事需材即按籍視其所嘗被舉科格隨事試之有勞
又著之籍内外官闕取嘗試有效者隨科授職所賜告
命仍具舉主姓名其人任官無狀坐以繆舉之罪庶幾
人人重慎所舉得才詔從之 乙丑夏國主秉常卒年
三十六偽諡康靖皇帝廟號惠宗墓號獻陵子乾順即
位 上官均奏乞尚書省事類分輕重某事關尚書某
事關二丞某事關僕射從之 劉摯言乃者朝廷患免

役之弊下詔改復差法而法至今不能成朝廷患常平之弊並用舊制施行曾未累月復變為青苗之法其後又下詔切責首議之臣而斂散之事至今行之如初此二者大事也而反覆二三尚何以使天下信從且改之易之誠是耶君子猶以為反今況改易未必是徒以暴過舉於天下則曷若謹之於始乎 庚午夏國遣使來賀坤成節 八月辛卯詔復常平舊法罷青苗錢初范純仁以國用不足請再立常平錢穀斂散出息之法朝

廷用其言司馬光方以疾在告不與也已而臺諫共言其非皆不報光尋具劄子言先朝散青苗本為利民並取情願後提舉官速要見功務求多散今禁抑配則無害也蘇軾奏曰熙寧之法未嘗不禁抑配而其為害也至此民家量入為出雖貧亦足若令分外得錢則費用自廣今許人情願是為設法罔民使快一時非理之用而不慮後日催納之患非良法也會王巖叟朱光庭王覲等交章乞罷青苗光始大悟力疾入朝於簾前奏曰

是何姦邪勸陛下復行此事純仁失色却立不敢言太皇太后從之即詔常平依舊法青苗錢更不支俵除舊欠二分之息元支本錢驗見欠多少分料次隨二稅輸納太皇太后諭輔臣曰臺諫官言近日除授多有不當光曰朝廷既令臣僚各舉所知必且試用待其不職然後罷黜亦可并坐舉者呂公著曰舉官雖委人亦須執政審察人材光曰自來執政止於舉到人中取其所善者用之韓維曰光所言非是直信舉者之言不先審察

待其不職而罰之甚失義理公著曰近除用多失亦由
限以資格光曰資格亦不可少維曰資格但可施於敍
遷若升擢人材豈可拘資格耶 壬辰封弟偲為祁國

公 丁酉司馬光以疾作先出都堂遂謁告自是不復
入朝 癸卯以通直郎崇政殿說書程頤兼權判登聞
鼓院 九月丙辰朔尚書左僕射兼門下侍郎司馬光
卒太皇太后哭之慟帝亦感涕不已明堂禮畢皆臨奠
贈太師溫國公諡文正官其親族十人御篆表其墓道

曰忠清粹德之碑光居洛陽十五年天下以為真宰相
田夫野老皆號為司馬相公婦人孺子亦知其為君實
也及為門下侍郎蘇軾自登州召還緣道人相聚號呼
曰寄謝司馬相公母去朝廷厚自愛以活我光在相位
遼夏使至必問光起居宋使往亦如之遼人敕其邊吏
曰中國相司馬矣切毋生事開邊隙光自見言行計從
欲以身徇社稷躬親庶務不舍晝夜賓客見其體羸舉
諸葛亮食少事煩以為戒光曰死生命也為之益力病

革不復自覺諄諄如夢中語然皆朝廷天下事也既沒其家得遺奏八紙皆手札論當世要務百姓聞其喪罷市而往弔鬻衣而致奠巷哭而過車蓋以萬千數京師民畫其像刻印鬻之家置一本飲食必祝焉四方皆遣人求之京師時畫工有致富者及歸葬陝州四方來會者數萬人哭之如哭其私親光孝友忠信恭儉正直居處有法動作有禮自少至老語未嘗妄自言吾無過人者但平生所為未嘗有不可對人言者耳誠心自然天

下信之陝洛間皆化其德光於物澹然無所好於學無所不通唯不喜釋老曰其微言不能出吾書其誕吾不信也蘇軾嘗論光所以感人心動天地者而蔽以二言曰誠曰一君子以為篤論 己未朝獻景靈宮辛酉大享明堂以神宗配 程頤在經筵多用古禮蘇軾謂其不近人情深疾之每加玩侮方司馬光之卒也明堂降赦臣僚稱賀訖兩省官欲往奠光頤不可曰子於是日哭則不歌坐客有難之者曰孔子言哭則不歌不言歌

則不哭軾曰此乃枉死市叔孫通所制禮也衆皆大笑
遂成嫌隙 劉摯言伏見左僕射司馬光薨逝縉紳閭
巷之人罔不為之哀歎唯是姦邪之黨醜正惡直之徒
相與竊喜盖小人鞅鞅不快於新政日夜窺伺常幸有
非意之變善治不能成今其臆度謂陛下既失光之助
則前日求治之志必稍變懈遂可以乘便投隙熒惑動
搖此其所以喜也今大本已定惟陛下益加之意終始
如一而已廟堂之上必有能如光之事君者臣實懼陛

下悼光之沒謂誰助我者而意稍有間則邪謀陰計或起而乘之此臣所以私憂也今日之命相實繫天下之安危伏望陛下謹考歷選得其人而任之以厭公議

丁卯以中書舍人蘇軾為翰林學士知制誥詔諸路

坊郭第五等以上及單丁女戶寺觀第三等以上舊納免役錢並與減放五分餘皆全放仍自元祐二年始

已卯張璪罷為光祿大夫資政殿學士知鄭州臺諫交章論璪凡十數太皇太后宣諭王巖叟曰明堂大禮後

璪必退至是乃引疾請外竟從優禮罷去 孫升奏祖

宗之用人如趙普王旦韓琦此三人者文章學問不見
於世然觀其德業器識功烈治行近世輔相未有其比
而王安石為一代文宗進居大任施設之方一出於私
智由是言之則輔佐經綸之業不在乎文章學問也今
蘇軾之學中外所服然德業器識有所不足為翰林學
士可謂極其任矣若或輔佐經綸則願陛下以王安石
為戒世譏其失言 冬十月丙戌改封孔子後為奉聖

公鴻臚卿孔宗翰言孔子後自漢以來有褒成奉聖宗
聖之號至於國朝益加崇禮真宗東封臨幸賜子孫世
襲公爵本為侍祠然兼領他官不在故郡於名為不正
乞自今襲封之人使終身在鄉里詔改衍聖公為奉聖
公不預他職增給廟學田百頃供祭祀外許均贍族人
賜國子監書置教授一員以訓其子弟 庚寅太白晝
見 壬辰夏人來告哀詔自元豐四年用兵所得城砦
待歸我永樂所陷人民當盡畫以給還遣穆衍張楫往

弔祭 乙巳賜范鎮詔曰夫有德君子以精神折衝譬
之麟鳳能服猛鷲朕虛懷前席以致諸老非敢必以事
諉也苟得黃髮之叟皤然在位則朝廷尊嚴姦宄消伏
卿雖篤老乃心王室母憚數舍之勞以副中外之望已
降勅落致仕除兼侍讀詔書到日可即赴闕 己酉宗
正寺丞王鞏奏宗正寺條例玉牒十年一進修玉牒官
以學士典領自熙寧中范鎮等一進之後神宗玉牒至
今未修仙源類譜自慶厯八年張方平進書之後僅五

十年並無成書請更立法玉牒二年一具草繳進類譜亦如之候及十年類聚修纂從之 劉摯言太學條例

獨可按據舊條考其乖戾泰甚者刪去之若乃高濶以慕古新奇以變常非徒無補而又有害乞罷修學制所止責學官正錄以上將見行條制去留修定摯言慕古變常盖指程頤也頤大槩以為學校禮義相先之地而月使之爭殊非教養之道請改試為課有所未至則學官召而教之更不考定高下置尊賢堂以延天下道德

之士鑄解額以去利誘省繁文以專委任勵繩檢以厚
風教及置待賓吏師齋立觀光法凡數十條輒為禮部
疏駁願亦自辨理然朝廷訖不行 十一月乙卯禮部
言將來冬至節命婦賀坤成節例改牋為表從之程願
建言神宗喪未除節序變遷時思方切恐失居喪之禮
無以風化天下乞改賀為慰不從 戊午以尚書左丞
呂大防為中書侍郎御史中丞劉摯為尚書右丞自張
璪罷中書侍郎久未補人呂公著言呂大防忠實可任

大事退而上表曰檢會官制以前中書宰臣二員參知政事二員今雖分三省事多同呈然機務之本並在中書臣多病早衰難以獨當機務伏望早賜選用中書一員庶不致廢曠帝又以手札問公著曰卿前日言劉摯可執政緣未作尚書恐無此例欲且除尚書公著奏國朝自中丞入二府者如賈昌朝張昇趙槩馮京等其例甚多帝從其言摯遂自中丞入輔以傅堯俞為御史中丞仍兼侍讀先是河決大名詔祕書監張問相度

河北水事又以王令圖領都水同往丙子間奏臣至滑
州決口相視迎陽埽至大小吳水勢低下舊河淤仰故
道難復請於南樂大名埽開直河并簽河分引水勢入
孫村口以解北京向下水患令圖亦以為然於是減水
河之議復起會北京留守韓絳奏引河近府非是詔問
別相視 戊寅以起居郎蘇轍起居舍人曾肇並為中
書舍人肇仍充實錄院修撰王巖叟言肇天資甚陋人
望至卑早乘其兄布朋附王安石擅權用事朝廷美爵

如取於家故肇因緣得竊館職素無吏能而擢領都司殊昧史材而委修實錄凡八上章皆不聽朝廷起范鎮欲授以門下侍郎鎮雅不欲起又移書問其從孫祖禹祖禹亦勸止之鎮大喜曰是吾心也凡吾所欲為者司馬君實已為之何用復出也遂固辭表曰六十三而求去蓋已引年七十九而復來豈云中禮卒不起命提舉崇福宮數月告老以銀青光祿大夫致仕御史中丞傅堯俞初視事與侍御史王巖叟同入對帝諭堯俞

曰用卿作中丞不由執政以卿公正不避權貴如朝政
闕失卿等當極言之 三省奏立經義詞賦兩科從之

詔府界三路保甲人戶五等以下地土不及二十畝
者雖三丁以上並免教從呂陶請也 庚辰蠲鹽井官

溪錢 十二月庚寅詔將來服除依元豐三年故事羣
臣勿上尊號 戊戌華州鄭縣小數谷山崩 壬寅朱

光庭言學士院試館職策題云欲師仁宗之忠厚而患
百官有司不舉其職或至於媮欲法神考之勵精而恐

監司守令不識其意流入於刻又稱漢文寬大長者不聞有怠廢不舉之病宣帝綜核名實不聞有督察過甚之失臣以謂仁宗之深仁厚德如天之為大漢文不足以過也神考之雄才大畧如神之不測宣帝不足以過也今學士院考試官不識大體反以媿刻為議論乞特奮睿斷正考試官之罪策題蘇軾文也詔特放罪軾聞而自辨詔追回放罪指揮傅堯俞王巖叟各上疏論軾呂陶言蘇軾所撰策題蓋設此問以觀其答非謂仁宗

不如漢文神考不如漢宣臺諫當徇至公不可假借事
權以報私隙議者皆謂軾嘗戲薄程頤光庭乃其門人
故為報怨夫欲加軾罪何所不可必指其策問以為訕
謗恐朋黨之禍自此起矣 戊申詔以冬溫無雪決繫
囚 是歲河北及楚海諸州水

二年春正月壬戌王覲言朱光庭訐蘇軾策問呂陶力
辨之臣謂軾之辭不過失輕重之體耳若悉考同異深
究嫌疑則兩岐遂分黨論滋熾夫學士命詞失指其事

尚小使士大夫有朋黨之名此大患也太皇太后深然
之時議者以光庭因軾與其師程頤有隙而發而陶與
軾皆蜀人遂起洛蜀二黨之說故覲有是疏 夏國以
其故主秉常留遺物遣使來進乙丑封乾順為夏國王
如明道二年元昊除節度使西平王例 戊辰詔自今
舉人程試並許用古今諸儒之說或出已見勿引申韓
釋氏書考試官以經義論策通定去留毋於老列莊子
出題 辛未傅堯俞王巖叟入對論蘇軾策題不當太

皇太后曰此朱光庭私意卿等黨光庭耳堯俞巖叟同
奏曰臣等蒙宣諭謂黨附光庭彈軾上幸任使更不敢
詣臺供職伏俟譴斥 丙子詔蘇軾所撰策題即無譏
諷祖宗之意然自来官司試人亦無將祖宗治體評議
者蓋一時失於檢會劄付學士院知令傳堯俞王巖叟
朱光庭速依舊供職蓋從呂公著議也 辛巳詔蘇轍
劉攽編次神宗御製 白虹貫日 二月丁亥遣左司
諫朱光庭乘傳詣河北路與監司一員徧視災荒措置

賑濟 賜富弼神道碑以顯忠尚德為額仍命翰林學士蘇軾撰文 詔施黔戎瀘等州保甲監司免歲閱

己丑知澶州王令圖相度河北水事張問奏乞如前議分河水入孫村口置約使復歸東流故道從之 己亥

命吏部選人改官歲以百人為額 辛亥觀文殿大學

士知陳州蔡確坐弟軍器少監碩貨用官錢事落職

徙知安州 是月代州地震 三月丁巳太皇太后詔

曰祥禪既終典冊告具而有司遵用章獻明肅皇后故

事謂予當受冊於文德殿雖皇帝盡孝愛之意務極尊崇而朝廷有損益之文各從宜稱仰惟明肅章獻皇后輔佐真廟擁佑仁宗茂業豐功宜見隆異顧予涼薄敢企徽音稽用舊儀實有慙德將來受冊可止就崇政殿壬戌輔臣奏事延和殿太皇太后諭曰性本好靜昨止緣皇帝幼冲權同聽政盖非得已况母后臨朝非國家盛事文德殿天子正衙豈女主所當御呂公著等言陛下執謙好禮冠映古今加以思慮精深非臣等所及

戊辰詔內外待制大中大夫以上歲舉第二任通判
資序堪知州者一人呂陶言任官之弊其輕且濫者惟
郡守為甚故有是詔 令御史臺察民俗奢僭者 夏
國遣使來謝封冊 癸酉奉安神宗神御于景靈宮宣
光殿 庚辰詔內侍省供奉官以下至黃門以百人為
定額 是月神宗大祥范祖禹上疏太皇太后曰今即
吉方始服御一新奢儉之端皆由此起凡可以蕩心悅
目者不宜有加於舊皇帝聖性未定覩儉則儉覩奢則

奢所以訓導成德者動宜有法今聞奉宸庫取珠戶部
用金其數至多恐增加無已願止於未然崇儉敦樸輔
養聖性使目不視靡曼之色耳不聽淫哇之聲非禮勿
動則學問日益聖德日隆此宗社無疆之福故事服除
開樂當置宴祖禹以為如此則似因除服而慶賀非君
子不得已而除之之意也請罷開樂宴惟因事則聽樂
庶合先王禮意從之 程頤上疏曰臣近言邇英漸熱
乞就崇政延和殿聞給事中顧臨以延和講讀為不可

臣料臨之意不過謂講官不可坐於殿上以尊君為說
爾臣不暇遠引以本朝故事言之太祖召王昭素講易
真宗令崔頤正講尚書邢昺講春秋皆在殿上當時仍
是坐講此祖宗尊儒重道之盛美萬世帝王所當法也
今世俗之人能為尊君之言而不知尊君之道人君惟
道德益高則益尊若勢位則崇高極矣尊嚴至矣不可
復加也 是月王令圖死以王孝先代領都水亦請如
令圖議時知樞密院事安燾深以東流為是兩疏言朝

廷之議回河獨憚勞費不顧大患蓋自小吳未決以前
河入海之道雖屢變移而仍在中國故京師恃以北限
強隣景德澶淵之事可驗也且河決每西則河尾益北
若復不止則南岸遂非我有彼必作橋梁守以州郡如
慶厯中因取河南熟戶之地遂築軍以窺河外已然之
效如此蓋自河而南地勢平衍直抵京師長慮却顧可
為寒心今欲便於治河而緩於設險非計也文彥博議
與燾合中書侍郎呂大防從而和之三人者力主其議

同列莫能奪中書舍人蘇轍謂呂公著曰河決而北自
先帝不能回而諸公欲回之是自謂智勇勢力過先帝
也盍因其舊而修其未備乎公著唯唯曰當與公籌之
然回河之役遂興 夏四月丁亥果莊使其子結鄂特促
寇洮東 文彥博累章乞致仕己丑詔彥博十日一赴
朝參因至都堂議事仍一月一赴經筵 辛卯詔自今
月十一日避正殿減常膳公卿大夫其勉修厥職共圖
消復以梁燾奏春夏大旱故也 丁酉以四方牒訴上

尚書者或冤抑不得直令御史分察之用范純仁之言也 己亥太皇太后以旱權罷受冊禮 詔諸路監司

分督郡縣刑獄 癸卯雨 甲辰張舜民罷監察御史

依前權判登聞鼓院先是舜民言夏人政亂強臣爭權乾順存亡未可知朝廷未宜遽加爵命近差封冊使劉奉世等幸勿遣緣大臣有欲優加奉世者為是過舉大臣指文彥博也故舜民有是責傳堯俞乞速賜追還以協易不遠復之義王巖叟孫升上官均韓川梁燾王覲

皆以為言不報 乙巳以布衣彭城陳師道為亳州司
戶參軍充徐州教授師道受業於曾鞏博學善為文熙
寧中王氏經義盛行師道心非其說遂絕意進取至是
以蘇軾傳堯俞孫覺薦授是職尋又用梁燾薦為太學
博士言者謂在官嘗越境至南京見蘇軾改潁州教授
又論其進非科第罷歸調彭澤令不赴家素貧或經日
不炊妻子慍見弗恤也 呂公著請復制科詔復置賢
良方正能直言極諫科自今年始 戊申御殿復膳

李清臣罷時熙豐法度一切釐正清臣固爭之以為不可於是傅堯俞王巖叟言清臣竊位日久資材闒茸性行險邪專於為已有患失之心苟於隨人無自立之志人材之能否不知民事之利病不識聞每至都堂會議但飽食危坐若醉若夢伏望聖慈早賜罷黜上官均梁燾相繼論之遂罷為資政殿學士知河陽 五月王巖叟傅堯俞等言臣等累章論張舜民不當罷御史不蒙開納言責難以冒居伏望降黜呂公著慮言者將激怒

上意致朝廷有罪言者之失乃奏乞稍與優遷令解言
職 癸丑夏人圍南川砦 丁卯以尚書右丞劉執為
尚書左丞兵部尚書王存為尚書右丞 戊辰貶右諫
議大夫梁燾知潞州侍御史孫升知濟州先是燾乞還
張舜民臺職以正國體章十上不聽又於省中面責給
事中張問不能駁還舜民制命以為失職因詰問貪祿
不去不知世所謂羞恥而升亦劾問引燾不知羞恥等
語坐朋附同貶 癸酉以胡宗愈為御史中丞宗愈首

進六事曰端本正志知難加意守法畏天他日奏對便
殿帝問朋黨之弊宗愈曰君子謂小人為姦邪則小人
必指君子為朋黨陛下擇中立不倚者用之則朋黨自
消因進君子無黨論 六月甲申以京西路提點刑獄
彭汝礪為起居舍人執政有問新舊之政者汝礪曰政
無彼此之辨一於是而已今所更大者取士及差役法
行之而士民皆病未見其可也 戊子以丁隲為右正
言隲自行新法即不肯為知縣折資監當幾二十年人

多稱之 以秘閣校理諸城趙挺之為監察御史挺之始通判德州希意行市易法時黃庭堅監德安鎮謂鎮小民貧不堪誅求及召試館職蘇軾曰挺之聚斂小人學行無取豈堪此選挺之深銜之 辛丑以同知樞密

院安燾知樞密院事 壬寅有星如爪出文昌 阿里

庫逼果莊率衆竊據洮州殺虜人畜羗酋結約密使所部奇凌來告阿里庫遣人執奇凌結約恐事覺以其妻子來歸丙午授結約三班奉職 秋七月辛亥詔戶部

修會計錄 開府儀同三司判大名府韓絳以司空致仕 夏人寇鎮戎軍諸堡劉昌祚等禦之而退 詔府界三路教閱保甲復課利場務虧額科罰 乙卯權開封府推官張商英出提點河東刑獄初朝廷稍更新法商英上書言三年無改於父之道今先帝陵土未乾奈何輕議變更又嘗移書蘇軾求入臺有老僧欲住烏寺呵佛罵祖之語或得之以告呂公著公著不悅故出之丙辰罷諸州數外歲貢 戊午以遼使蕭德崇等賀

坤成節曲宴垂拱殿始用樂 庚申進封李乾德為南
平王 辛酉改誠州為渠陽軍 壬戌御札付中書省
曰門下侍郎韓維嘗面奏范百祿任刑部侍郎所為不
正輔臣奏劾臣僚當形章疏明論曲直豈但口陳意欲
無迹何異姦讒可罷守本官分司南京呂公著上疏言
自來大臣造膝密論亦未嘗須具章疏維素有人望忽
然峻責罪狀未明恐中外聞之人情不安呂大防亦以
為言甲子詔維除資政殿大學士知鄧州中書舍人曾

肇封還詞頭其狀曰古者坐而論道謂之三公豈必具
案牘為事今陛下責維徒口奏而已遂以為有無君之
意臣恐命下之日人心眩惑謂陛下以疑似之罪而逐
大臣不報已而公著復於便殿乞改維詞頭乃詔中書
省以均勞逸意命舍人蘇轍為之維尋以病改汝州

乙丑以左司諫呂陶為京西轉運副使侍御史上官均
為禮部員外郎先是御史杜純右司諫賈易緣張舜民
罷職事劾陶均面欺同列不肯論救陶自請補外上疏

言杜純乃韓維之客以此媚維賈易乃程頤之死黨為
頤報怨必欲臣廢逐而後已惟陛下幸察易凡五狀劾
陶謂詭譎姦人託朋附以自安故陶均皆罷言職而陶
獨外補 八月辛巳右司諫賈易罷知懷州自蘇軾以

策題事為臺諫官所言而言者多與程頤善軾頤交惡
其黨迭相攻易獨建言請并逐二人又言呂陶黨軾兄
弟而文彥博實主之語侵彥博及范純仁太皇太后怒
欲峻責易呂公著言易所言頗切直惟詆大臣太甚爾

乃止罷易諫職出外公著退語同列曰諫官所言未論得失顧主上春秋方盛慮異時有導諛惑上心者正賴左右爭臣不可豫使人主輕厭言者衆皆嘆服程頤罷經筵權同管勾西京國子監先是頤赴講會帝瘡疹不御邇英已累日頤退詣宰相問曰上不御殿知否曰不知曰二聖臨朝上不御殿太皇太后不當獨坐且人主有疾而宰相不知可乎翼日呂公著等始以頤言問疾由是大臣多不悅故黜之頤因三上章乞納官歸田

里不報又乞致仕亦不報時呂公著獨相羣賢在朝不能不以類相從遂有洛黨蜀黨朔黨之號洛黨以頤為首而朱光庭賈易為輔蜀黨以蘇軾為首而呂陶等為輔朔黨以劉摯梁燾王巖叟劉安世為首而輔之者尤衆是時熙豐用事之臣退休散地怨入骨髓陰伺間隙而諸臣不悟各為黨比以相訾議唯呂大防秦人慙直無黨范祖禹師司馬光不立黨 癸未以西蕃寇洮河民被害者給錢粟死者賜帛其家 乙酉命呂大防為

西京安奉神宗御容禮儀使 丁亥孔文仲丁鴈進對
太皇太后宣諭曰一心為國勿為朋黨 癸巳以夏國
政亂主幼強臣乙逋等擅權逆命詔諸路帥臣嚴兵備
之 庚子授西蕃首領森摩欽戩銀州團練使溫希新
瓜州團練使以不從結鄂特促入寇故也 辛丑涇原路

言夏人寇三川諸砦官軍敗之 丁未熙河路言知岷
州种誼復洮州擒果莊青伊結戊申宰臣率百官表賀
果莊桀黠有智謀所部精銳數為邊患熙寧中誘陷河

州神宗屢詔王韶欲生致之至是與夏人解仇為援築
洮州居之誼率衆破其城擒鬼章檻送京師誼諤之弟
也時二邊少清而並塞猶苦寇掠安燾言為國者不可
好用兵亦不可畏用兵好則疲民畏則遺患今朝廷每
戒疆吏非舉國入寇毋得應之則固畏用兵矣雖僅保
障戍實墮其計中願復講攻擾之策且乾順幼豎梁氏
擅權族黨酋渠多反側顧望若有以離間之未必不回
戈而復怨此制勝一奇也其後夏人自相攜貳使來修

貢悉如燾言 九月乙卯發太皇太后冊寶于大慶殿

丙辰發皇太后皇太妃冊寶于文德殿 己未夏人寇

鎮戎軍 庚申王覲奏蘇軾程頤向緣小忿浸結仇怨

於是頤軾素所親善之人更相詆訐以求勝勢前日頤

去而言者及軾故軾乞補外既降詔不允尋復進職經

筵今執政大臣有闕若欲保全軾則且勿大用庶幾使

軾不遽及於悔吝又奏小人近乃造為飛語有五鬼十

物十八姦之說大槩不過取一二公議所共惡者以實

其言而餘皆端良之士也伏望詔榜朝堂明示不信讒
言之意以安士大夫之心 夏人寇鎮戎軍 丁卯禁
私造金箔 庚午呂公著言十五日以經筵講畢論語
賜輔臣及講官宴內出御書唐賢律詩分賜臣等次日
於簾前謝蒙太皇太后宣諭皇帝好學在宮中別無所
為惟是留心典籍天下幸甚臣輒於尚書論語孝經中
節取要語共一百段進呈庶便於省覽它日三省奏事
畢太皇太后宣諭公著曰皇帝取卿所進每日書寫看

覽甚有益於學問與詩篇不同也 冬十月知懷州賈

易責知廣德軍易謝表謂以忠直獲罪而指言羣臣讒
邪罔極朋黨滔天又言蘇轍持密以告人轍上疏自辨
於是御史交章論易諂事程頤默受教戒附下罔上背
公死黨乞早賜降黜詔以易已罷言職不合於謝上表
內指名論事故有是責 壬午奉安神宗御容于會聖
宮及應天院 辛卯減西京囚罪一等杖已下釋之

庚子論復洮州功种誼等遷秩賜銀絹有差 癸卯劉

執言知陳州傅堯俞知齊州王巖叟知潞州梁燾通判
號州張舜民知廣德軍賈易皆忠直之臣守正不撓願
召此數人入備任使以慰公議以消姦黨 甲辰泉州
增置市舶從戶部尚書李常請也 丁未范祖禹乞於
邇英閣復張挂仁宗時王洙蔡襄所書無逸孝經圖從
之 十一月丙辰復置漣水軍 庚申獻果莊于崇政
殿詰犯邊之狀諭以聽招其子及部屬歸附以自贖果
莊服從赦之以為陪從校尉遣居泰州 壬申詔講讀

官遇不開講日輪具漢唐故事有益政體者二條進入
先是蘇頌言國朝典章大抵沿襲唐舊乞詔史官採新
唐書中人主所行日進數事故有是詔頌每進可為規
戒有補時政者必述以已意反覆言之 乙亥大雪民
多凍死詔加賑恤其無親屬者官瘞之 罷內殿承制
試換文資格 十二月乙酉以大寒賜諸軍薪炭錢又
令開封府閱坊市貧民以錢百萬計口量老少給之
丙戌龍興節初上壽于紫宸殿 己丑大寒罷集英殿

宴 壬辰兀征聲延部族老幼萬人渡河南遣使廩食
之仍諭聲延勿失河北地 乙未白虹貫日 壬寅頒
元祐勅令式 丙午趙挺之奏蘇軾輕薄虛誕有如市

井俳優學術本出戰國策縱橫揣摩之說近日學士院

策試廖正一館職乃以王莽袁紹董卓曹操篡漢之術

為問使軾得志將無所不為矣

考異東都事畧趙挺之傳挺之劾奏蘇軾草麻

有云民亦勞止以為誹謗先帝

宋史同未審即此奏中語否

是冬始閉汴口

三年春正月庚戌復置廣惠倉從侍講范祖禹言也

己未朝獻景靈宮 庚申詔發京西南路闕額禁軍穀
五十餘萬斛減市價出糶至麥熟日止以雪寒物價翔
踴也 王覲奏蘇軾習為輕浮貪好權利不通先王性
命道德之意專慕戰國縱橫捭闔之術長於辭華而暗
於義理若使久在朝廷則必立異妄作宜且與一郡稍
為輕浮躁競之戒 辛酉詔廣南西路朱崖軍開示恩
信許生黎悔過自新 壬戌罷上元遊幸 壬申阿里
庫奉表謝罪詔邊將無出兵仍罷招納 二月甲申罷

修金明池橋殿 時久陰不解翰林學士兼侍讀蘇軾
言差役之法天下以為未便獨臺諫官數人者主其議
以為不可改人畏之而不敢發近聞疎遠小臣張行者
力言其弊而諫官韓川深詆之至欲重加貶竄此等亦
無他意方司馬光在時則欲希合光意及其既沒則妄
意陛下以為主光之言殊不知光至誠盡公本不求人
希合而陛下虛心無我亦豈有所主哉使光無恙至今
見其法稍弊則更之久矣臣每見呂公著安燾呂大防

范純仁皆言差役不便但為已行之令不欲輕變兼恐
臺諫紛爭卒難調和願陛下問呂公著等令指陳差雇
二法各有若干利害惜人雇役中等人戶歲出錢幾何
今者差役歲費錢幾何及幾年一次差役皆可以折長
補短約見其數以此計筭利害灼然而況農民在官貪
吏狡胥百端蠶食比之雇人苦樂十倍民窮無告致傷
陰陽之和今來所言萬一少有可采即乞留中作聖意
行下庶幾上答天戒下全小民 丙戌詔河東苦寒量

度存恤戍兵 己丑以左司諫豐稷為國子司業揚王
顥荆王頤嘗令成都府路走馬承受造錦地衣稷獨奏
劾以謂近屬奢侈官吏奉承宜皆糾正其罪給事中趙
君錫曰諫官如是天下必太平不數日稷罷言職 詔
殿試經義詩賦人並試策一道從趙挺之請也 知貢

舉蘇軾同孫覺孔文仲言每一試進士諸科及特奏名
約八九百人舊制禮部已奏名至御試而黜者甚多嘉
祐始盡賜出身近雜犯亦免黜落皆非祖宗本意進士

升甲本為南省第一人唱名近下方特升之皆出一時
聖斷今禮部十人以上別試國子開封解試武舉第一
人經明行修進士及該特奏而預正奏者定著於今遞
升一甲則是法在有司恩不歸於人主甚無謂也今特
奏者約已及四百五十人又許例外遞減一舉則當復
增數百人此曹垂老無他望布在州縣惟務黷貨以為
歸計前後恩科命官數千人矣何有一人能自奮厲有
聞於時而殘民敗官者不可勝數以此知其無益有損

議者不過謂宜廣恩澤不知吏部以有限之官待無窮之吏戶部以有限之財祿無用之人而所至州縣舉罹其害乃即位之初有此過舉謂之恩澤非臣所識也願斷自聖意止用前命仍詔考官量取一二十人委有學問詞理優長者即許出官其餘皆補文學長史之類不理選限於是詔定特奏名考取數進士入四等以上諸科入三等以上通在試者計之母得取過全額之半後遂著為令

癸巳罷春宴

乙未白虹貫日

以正字

劉安世為右正言司馬光既歿太皇太后問呂公著光
門下士素所厚善可任臺諫者孰當先用公著以安世
對遂擢任之 乙巳廣南東路兵馬監童政坐擅殺無
辜伏誅 二月丙辰司空致仕康國公韓絳卒諡曰獻
肅絳莊重有禮遇事敢為喜延接士大夫始與王安石
善其後頗異因數稱薦司馬光可大用然終以黨安石
復得政清議少之 己巳賜進士李常寧等并諸科及
第出身共一千一百二十二人 甲戌增賜新釋褐進

士錢百萬酒五百壺為期集費 乙亥夏人寇德靜砦
將官張誠等敗之 夏四月戊寅令諸路郡邑具役法
利害以聞 尚書右僕射兼中書侍郎呂公著以年老
數辭位辛巳拜司空平章軍國事詔一月三赴經筵二
日一朝因至都堂議事出省毋拘以時別建第於東府之
南啟北扉以便執政就議宋興以來宰相以三公平章
軍國事者四人而公著與父夷簡居其二世以為榮
以中書侍郎呂大防為尚書左僕射兼門下侍郎同知

樞密院范純仁為尚書右僕射兼中書侍郎制詞皆蘇軾所草也是夕軾對於內東門小殿既承旨太皇太后忽問曰卿前年為何官曰臣前年為汝州團練副使今為何官曰臣今待罪翰林學士曰何以遽至此軾曰遭遇太皇太后皇帝陛下曰非也軾曰豈大臣論薦乎曰亦非也軾驚曰臣雖無狀不敢自他途以進太皇太后曰此乃先帝之意也先帝每誦卿文章必嘆曰奇才奇才但未及用卿耳軾不覺哭失聲太皇太后泣帝亦泣

左右感涕已而命坐賜茶撤御前金蓮燭送歸院軾在翰林頗以言語文章規切時政畢仲游以書戒之曰夫言語之累不特出口者為言其形於詩歌贊於賦頌託於碑銘著於序記者皆言語也今知畏於口而未畏於文是其所是則見是者喜非其所非則蒙非者怨喜者未必能濟君之謀而怨者或已敗君之事矣官非諫臣職非御史而好是非人危身觸諱以遊其間殆猶抱石而救溺也軾不能從 壬午以觀文殿學士兼侍讀孫

固為門下侍郎尚書左丞劉執事為中書侍郎尚書右丞
王存為尚書左丞御史中丞胡宗愈為尚書右丞戶部
侍郎趙瞻為僉書樞密院事 甲申韓川劉安世進對

太皇太后問近日差除如何安世對曰朝廷用人皆協
輿望惟胡宗愈公議以為未允耳 丁未中書舍人曾

肇言昨奉使契丹還至河北竊聞朝廷命王孝先開
孫村口減水河欲為回河之計詢之道路皆云見今河
流就下故道地形甚高兼係黃河退背地分恐難成功

當河北累年災傷之後未宜有此興作伏望聖慈更下水官及河北路監司公共講求使議論早定不至枉費民力更招後悔 時熙豐用事之臣雖去其黨分布中外起私說以搖時政鴻臚丞常安民遺呂公著書曰善觀天下之勢猶良醫之視疾方安寧無事之時語人曰其後必將有大憂則衆必駭笑惟識微見幾之士然後能逆知其漸故不憂其可憂而憂之於無足憂者至憂也今日天下之勢可為大憂雖登進忠良而不能搜致

海內之英才使皆萃於朝以勝小人恐端人正士未得
安枕而臥也故去小人為不難而勝小人為難陳蕃竇
武協心同力選用名賢天下想望太平然卒死曹節之
手遂成黨錮之禍張柬之五王中興唐室以謂慶流萬
世及武三思一得志至於竄移淪沒凡此者皆前世已
然之禍也今用賢如倚孤棟拔士如轉巨石雖有奇特
瓌卓之才不得一行其志甚可歎也猛虎負嵎莫之敢
撓而卒為人所勝者人衆而虎寡也故以十人而制一

虎則人勝以一人而制十虎則虎勝奈何以數十人而制十虎乎今怨忿已積一發其禍必大可不謂大憂乎公著得書默然及章惇作相其言遂驗安民邛州人也五月右諫議大夫王覲疏言胡宗愈自為御史中丞論事建言多出私意與蘇軾孔文仲各以親舊相為比周內批王覲論列不當落職與外任差遣翼日呂公著言覲若止為論列宗愈便行責降必不協衆情未敢行下後二日公著與呂大防范純仁再論於簾前太皇太

后意猶未解純仁退而上疏曰側聞聖訓謂朋黨甚多
宜早施行以臣愚見朝臣本無朋黨但善惡邪正各以
類分陛下既用善人則匪人皆憂難進遂以善人之相
稱舉者皆指為朋黨昔慶厯時先臣與韓琦富弼同為
執政各舉所知當時飛語指為朋黨三人相繼補外造
謗者公相慶曰一網打盡矣此事未遠願陛下戒之所
降貶謫王覲文字臣未敢僉書因極言前世朋黨之禍
并錄歐陽修朋黨論上之趙挺之楊康國亦言不當因


論人而逐諫官乞追寢罷覲之命不聽竟出覲知潤州而宗愈居位如故 癸亥漢東郡王宗瑗卒 六月丙

子朔詔鄉戶衙前役滿未有人替者依募法支雇食錢如願投募者聽仍免本戶身役不願投募者速召人替 癸未詔司諫正言殿中侍御史監察御史倣故事以升朝官通判資序歷一年者為之 戊戌詔黃河未復故道終為河北之患王孝先等所議已嘗興役不可中罷宜接續工料期於必成范純仁乞寢前命以杜希合

尚書王存等亦言孝先初未有必然之論但僥幸萬一
以冀成功且預求免責若遂聽之將有噬臍之悔乞選
使覆按審度可否興工未晚庚子三省樞密院奏事延
和殿文彥博呂大防安燾謂河不東則失中國之險為
契丹利范純仁王存胡宗愈則以虛費勞民為憂存謂
契丹自景德至今八九十年通好如一家設險何與焉
不然如石晉末耶律德光犯闕豈無黃河為阻況今河
流亦未必便衝過北界也太皇太后曰且熟議明日純

仁又畫四不可之說以進且曰北流數年未為大患而
議者恐失中國之利先事回改正如頃西夏本不為邊
患而好事者以為不取恐失機會遂興靈武之師也於
是收回戊戌詔書 辛丑夏人寇塞門砦 劉安世言
胡宗愈操行汙下毀滅廉恥誠不足以輔佐人主參預
國論乞特行罷免 時以炎暑權罷講癸丑侍講范祖
禹上疏曰陛下今日學與不學繫天下他日之治亂陛
下如好學則天下之君子以直道事陛下輔助德業而

致太平不好學則天下之小人以邪諂事陛下竊取富貴而專權利君子之得位欲行其所學也小人之得君將濟其所欲也用君子則治用小人則亂君子與小人在陛下心之所召且凡人之進學莫不於少時今聖質日長數年之後恐不得如今日之專竊為陛下惜也



資治通鑑後編卷八十八